

մօտ քսան տարի, Թէպէտ և յետոյ յիսուն տարու չափ աթոռը մնաց Շիրակայ Արգինա աւանում, բայց Ս. Աջի մասին յիշատակութիւն չկայ, Աչքի առաջ ունենալով, որ ԺԱ. դարում Բիւզանդական կայսրները շարունակ հետամուտ էին Հայոց կաթողիկոսութիւնն Հայաստանի միջից վերցնելու և երկիրն էլ արդէն մաս մաս եղած էր զանազան իշխանութիւնների ձեռքում, որ և պատճառ եղաւ, որ Պետրոս Ա. Գետադարձից յետոյ թէ աթոռը թափառական վիճակ ունեցաւ և թէ հանդէս եկան մի ևնոյն ժամանակ մի քանի կաթողիկոսներ, պէտք է կարծել թէ Ս. Աջը նոյն Աղթամարի կղզու վերայ և մնացել էր, Այս երևում է նախ այն հանգամանքից, որ Բարսեղ Ա. Պահլավունի կաթողիկոսն (1080—1113 թ.) հրամայեց Աղթամարից բերել իւր մօտ Ս. Լուսաւորչի Աջը, քօղը և գօտին, բայց միաբանները չտուին, և երկրորդ որ Թոռնիկ Մամիկոնեանի որդին Գաւիթ արքեպիսկոպոսն, հիմք բռնելով որ Աղթամարում են Ս. Լուսաւորչի աջն և այլ սրբութիւնները, միաբանեցուց իրեն հետ տեղական եկեղեցականներին և իշխաններին և 1113 թուին ձեռնադրուեցաւ կաթողիկոս, այդպէս ըսկիզբն դնելով Աղթամարի աթոռի, Այն ժամանակ արդէն Գրիգորի Գ. Պահլավունին (1113—1163 թ.) ընտրուած և ձեռնադրուած էր Հայոց կաթողիկոս, ուստի Սև լեռան վերայ, եկեղեցական ժողով գու-